

皇明詞林人物考

皇明詞林人物考卷之六

戴仲鵬

公名冠字仲鵬其先江西吉水人戴孟攷客游
信陽因家焉攷生緝訓訓生誼舉鄉試官趙王
左長史冠其仲子也以進士授戶部主事正德
甲戌上書曰臣聞立國以人聚人以財今國家
百六十年而海內虛耗物力頓屈豈不爲之慮
哉宣大陝西諸邊虜數侵軼部運之使相繼告
急加以直隸山東河南淮揚夏旱秋潦饑民流

陛下亦曾留心不也古人理財務去冗食
京師勢要人家子弟冒名奏冊坐取軍功錦衣
官屬爵級萬餘或藉勇士孩提食糧賄充監局
匠役皆爲國蠹歲運四百萬石不足以供所支
陛下何忍以赤子之膏血而養此無益之蠹
也邊儲屯田十不濟一升斗之粟仰給京倉虜
犯宣大大發京軍宣府日支銀可萬數邊軍土
長習戰若使糧餉以時不至饑寒自足制勝今
一有警急便遣京軍居則奪食戰則奪功邊軍

苦之烏肯盡其死力哉今宣府春秋免調官軍
三千餘名累經臣下論列 陛下堅不肯掣回
何也太倉之銀垂盡承運庫所存無幾逆瑾財
產 陛下不歸之有司而貯之豹房遂創新庫
以聚私財不過供翫奕具耳務鳩斂以爲帑積
之積乃匹夫商賈之行唐玄宗作瓊林大盈竟
至失國播遷貽笑天下後世 陛下何不舉百
千萬之藏籍付有司以給三軍戢守之資耶毋
舍堯舜而踵明皇之失德也 上大怒謫廣東

烏石驛丞烏石瀕海瘴癘難居冠種蔬力學宴
如也冠髮秀而長幾倍于身必兩人持之乃可
櫛沐嘗赴廣州海賊入舟毫無所獲因擊冠墮
水舟子提冠髮出之賊復揮刃斷其髮逐波流
去若有人捧足而出之者三久乃獲濟先是父
長史涉江夜聞水中羣鬼哭令人探深潭得鬮
髑無數徒瘞高原復夢前鬼謝曰終當有以報
白骨恩也至是人皆有以冥報云居廣東七年
稍起潛山知縣適嘉靖改元復戶部員外郎陞

延平府知府改蘇州陞山東按察副使提督學
校方一年之間而五遷也未履任遭父喪歸復
除陝西兵備副使以中風輿歸卒所著邃谷集
十二卷

唐文襄

公諱龍字虞佐浙蘭谿人正德戊辰進士知郟
城縣郟单散流賊且至公集壯丁守賊無敢睨
城去公追殺數百人以有功擢內臺風裁峻整
按滇南上疏諫巡遊斤燹幸轉按江西逆濠甫
平禁兵在境爲患公禁不得逞疏請班師民獲
安堵陞陝西按察副使督學校文貴雅正品士
先器識再陞山西按察使義感囚徒明燭誣獄
以太僕卿徵尋擢僉都御史總理漕運晉副都

召入臺陞吏部侍郎會關中饑邊多警進兵

部尚書兼右都御史總督三邊軍務公務賑卹
病者興流者復一時將佐樂爲用逾年虜犯寧
夏有柳門之捷犯延綏有清水之捷吉囊自將
十萬犯安會則又有興武乾講之捷前後俘獲
斬首幾千數廷議封爵不果入爲刑部尚書劉
源清以討亂卒過嚴劉淑相以奏訐執政皆坐
重典公論者皆得錄用加太子太保轉吏部尚
書公甄才望崇恬退拔滯幽錄救得未減執憲

持法權勢庇援無所避 上以九廟成恩宥太

禮大獄諸臣二十餘人公有力焉尋乞歸養朝

野榮之再起爲南京刑部尚書又改南兵部公

謂制敵在任將請待邊吏文法少寬故諸宿將

逮繫廢黜廢棄疏舉四十餘人無何疾卒年七

十公清忠耿直其臨大事正色直言意氣慷慨

神采英毅屹不可回而性大可率表裏洞見見

人之善與之惟恐後然嫉惡太過以是見媚於

人所著有易大旨歷官奏議漁石集文徵明曰

今制大臣歿既得請葬祭矣其易名以謚則稽
得視功出宸斷不輕昇也凡館閣侍從之賢
乃德謚文其部院諸曹間有得此者祖宗朝
迄今不數臣焉若冢宰唐公其一也公少從學
章文懿公之門得其源淵學優行鎮爲文章謹
嚴典重有左氏先秦風精詣閎肆號稱作者敷
歷中外隨試輒效聲望偉然而西師俘馘之功
爲多謚曰文襄議者謂公足以當之矣

劉涇

六息道

公名麟字元瑞一字子振南京鷹揚衛籍江西
安仁人弘治丙辰進士外戚張氏驕橫臺諫龐
津等歷詆罪狀 天子震怒下 詔獄逮治麟

獨上疏申救授刑部主事出守紹興蒞任纔五
十餘日四封驩然戴之若數十年者以不修問
逆瑾矯 旨廢爲編民郡人爲立生祠貧不能
歸遂寓居長興與邑民吳琉郡人施侃宜春龍
霓關中孫一元結社稱爲湖南五隱瑾誅起知

言木ノ物ニ
西安陞陝西叅政歷工部尚書奉建節慎庫與
臺臣同典出納自是財無濫用凡工部上供率
關內府中貴人輒陰自損增不受覆覈麟乃條
上當裁省者一十四事并見嘉納中貴人以是
憾之會遣近璫督造龍袍於蘇松麟謂尚衣自
有嘗供請罷之而嘆者益深竟令致仕麟居家
三十餘年蕭然一室賦詩自娛有求見者往往
遜避扁舟往來郡大夫物色訪之始得一見見
亦不談公事麟平生尚氣節以文學馳名於是

律詩步驟盛唐選漢魏字法羲獻短牘數字亦
不苟作時出譴語雋永有味片紙隻字人得之
爲至寶末年一意靜養求之者俱不應嘗欲建
樓以居無力內翰文衡山繪一圖名曰神樓騷
人墨客爭誅之衣冠必法古制年八十有八卒
贈太子太保謚曰清惠

鄒謙之

公名守益字謙之江西安福縣人也未生時父
易齋僉憲夢先聖孔子立於門之石母亦夢日
墮于懷旣而生公穎異不群博極群籍巡撫彭
公見而竒之曰是見出必爭鋒天下年十七舉
鄉試正德辛未會試陽明公爲同考嘉其文取
寘第一 廷試一甲第三授編修己卯謁陽明
于虔臺得聞其良知之說反復辨論公翻然有
悟曰道在是矣自是叅訂徃來不絕尋與 經

筵修國史會大禮議起上疏忤旨下詔獄謫
廣德州判精於吏事一郡稱神陞南禮部郎中
日與同志講學不輟辛卯給由以養病告歸尋
起南考功明年改洗馬陞太常少卿兼侍讀學
士掌南院陞國子祭酒辛丑九廟災令九卿
自陳公語多懇切遂落職閑住居家志切生民
每以地方興革事宜力贊有司致書當道悉施
行之疾之先月猶大會同志講論不廢公胸次
洞豁說理明透接引後學如坐春風以故海內

及門者傾心景慕至比之程伯子是誠一時道
學之宗也所著有文集諸書今行於世

楊用修

張愈光

楊慎字用修新都人舉進士第一爲翰林修撰
久之以伏闕事下詔獄攷問杖朝堂幾
死戍末昌三十餘年不得歸有集若干卷行於
世王鳳洲筆記云修撰翱翔中秘旣窮青藜之
校流戍南滇遂肆朱鼎之職凡所取材六朝爲
冠固一代之雄匠哉特其搜擷太饒格調時左
繁飾人工或累天悟又其微趣多在長吉振奇
之士卑其刻羽雕葉陋中之徒駭其牛鬼蛇神

鳳洲所評如此然余觀其著作者富絜林罕儷
丹鉛等書多至百種誠可爲博物閎攬者矣

張公名含字愈光號禹山永昌府人嘗舉鄉薦
不第遂不復仕以書史吟弄終其身素與升庵
楊翰撰善其詩多所評定君第合嘗司吏部父
南園公志淳嘗爲南都戶侍父子發解雲南

王純甫

公名道字純甫山東武城人正德辛未進士選
入中秘時山東寇亂欲奉祖母避地江南上疏
乞補學職詞極懇切得應天學教授居應天學
二載陞南儀部主事 召改吏部驗封歷考功
文選中更憂制前後在吏部十年雅操端潔大
學士西樵方公上言王道學行純正識度宏遠
可備宮僚之職乃擢春坊左諭德道引疾固辭
曰朝廷以名器爲重不輕假人以不次之官而

人臣惟義分是安當致謹於非分之獲伏望收
回成命庶大臣所薦雖不得經明行修之士猶
不失安分知耻之人於是得旨允以病歸而名
益高士大夫日跂其復用居一載起爲南京國
子監祭酒未幾又以疾乞歸自是一意家居屏
跡城府讀書講學種樹灌園以自適蓋不通仕
籍者十有三年而當時自公卿以至臺諫薦疏
日至嘉靖丙午起爲南京太常卿未至遷南戶
部侍郎尋改禮侍召掌北雍旋改吏部右侍郎

然借閱月道以屬疾遂不起矣道貌厚而氣溫
學篤而志遠始也馳騁詞翰旣而嘆曰此無益
也遂研精于義理之學取宋儒程朱書讀之又
取論語一部反覆潛玩有悅於心曰聖門平寔
簡易之學曰如是也道雖潛心理學而見世之
立門戶相標榜者則深耻之嘗言漢以前無名
道學者其人品如張文成曹相國黃叔度管幼
安皆真道學之流雖老釋二氏亦各有所見不
可厚非凡其言議不隨時苟同故能表見輩流

大自樹立不爲利害所動進退從容累遷銓曹
所任國子執法端教表率人才期于俗變風美
所著有大學億老子億易詩書春秋等億諸史
論斷大學衍義論斷批點六子書及韓柳歐蘇
文若干卷公於書無所不讀精擇強記妙契疾
書其所論著義理深到剖決明當陰陽律曆醫
卜農粟刑名地志之類靡不通貫曉悉焉

常明卿

公名倫字明卿山西沁水人父賜陝西按察司副使倫生而狀貌瓌竒七歲能文其語恠謫下筆輒滿紙性劣決難馴而父獨寬之賜先知鄧州倫從之居見諸卷軸觸手揮灑已則擲筆嬉戲去賜見之命人拾貯曰此兒可惜舉進士授大理評事志氣傲鷺凌駕儕輩大爲時所仇疾被劾謫壽州判官又大爲監司凌雲棄官歸轉寧羗州知州不赴家居走馬馳騁學射射輒中

的學盡學詞學字作校正字法一編然皆不逮
詩而小詞獨盛傳澤沁間妓兒優童咸彈絃出
口歌之至久久不廢曰常評事詞也倫既耽意
聲妓有妓則酣唱大酌或累日夕不醉而作詩
警敏則又若構會彌日者嘗曰豈有旋翻故紙
而後文乎以是人或謂倫寡讀書而益勝自負
倫家居已久忽欲入京補官道經潞安晨起不
告人跨生馬出馳城南馬渴赴水倫墮水死時
年三十七矣無後無戚故在側者人咸爲惜之

倫性磊宕耻言家計自入仕至罷不以俸貲自
入田隴所取寄之諸叔姪出納故喜談仙曰仙
人好樓居自號樓居子燒煉黃白無驗家益貧
既歿朝邑韓苑洛邦奇時爲山西按察副使爲
經紀其喪歸葬沁州而開州王溱哀梓其槁河
中劉成德撰表其墓溱成德皆倫友時俱有名

云

霍文敏

公名韜字渭先廣東南海縣人也少有異質諸
經子史過目不忘能辨祈疑義雖老師不如正
德癸酉鄉薦第一明年會試第一 廷試二甲
第一引例歸娶讀書西樵山中凡七年辛巳起
爲職方主事丙戌以議大禮合 上意陞少詹
事兼侍講學士歷陞詹事兼學士禮部右侍郎
己丑充會試考官尋陞吏侍與貴溪不合陞南
禮書己亥改北兼掌詹事府事加太子少保庚

子卒贈榮祿大夫太子太保謚文敏自爲主事
即上三劄皆切時政大禮議起廷論紛然公上
疏詆禮官執議之失詳辨禮經爲人後之文

上感泣因定大倫羣議始息自是感激遭遇知
無不言前後凡四十餘疏皆上關聖政下切民
生旁極時弊危言直指無所畏避其在南曹轉
移風俗甚多自公沒後弊政洊起譏者輒思之
曰使涓厓公在安得有此特來柄用天下惜之
卒年五十有四

所著有經解學辨及奏疏詩文全集凡若干卷今皆梓而行之

薛君采

公名蕙字君采鳳陽亳州人第進士授刑部主事病免起爲刑部主事調吏部考功主事歷郎中人遂稱薛考功云蕙自爲刑部時值武廟南狩抗疏諫禍將巨測蕙宴然安之及嘉靖初大禮議起廼撰爲人後解爲人後辯奏入下獄已而復官權貴人乃甚不釋會給事中構其罪蕙上書訟坐是罷後竟屢薦不起家居十八年卒蕙才思清淑脫屣塵壒與李何邊鄭諸人相

唱酬有集流傳海內人爭珍玩既罷官乃爲佳
園宴處痛罷爲詩潛心釋老著老子解供達磨
像案上陳邵堯夫詩曰是矣是矣箴以尚矣是
時浚儀王廷相安陽崔銑皆著書講性命廷相
有慎言有雅述銑有中庸凡蕙與往來詰辯詞
鋒利峻廷相嘗難二氏之道蕙答之曰二氏之
道乃修心之內學性之極談孔門之所罕言吾
儒所未聞也况其要歸蓋性命切近之實初非
幽深汗漫之論特旨其至近至神難于覺悟故

謂之玄妙耳儒者拒以不信既不足以知此而
二氏之徒能得其傳者亦寡矣然世之禪學猶
皆以明心見性爲宗無他也至於方士之流則
大背老莊之旨旁門岐徑不勝其多極其優者
亦有我有爲之小術耳老子曰聖人後其身而
身先外其身而身存非以其無耶故能成其私
此與自私自利貪生畏死者異矣致虛極守靜
篤歸根曰靜靜曰復命曰常不知常妄作凶此
與安排造作勞生求生者異矣西方之書曰若

菩薩通達無我法者如來說名真是菩薩又曰
一切賢聖皆以無爲法而有差別此與老子之
言豈非同條共貫乎卽二端而觀之可以見方
士之道之陋矣來教謂異僧方士率多長年夫
聞道者生死修短一也苟不聞道則生死之末
路與殤子何殊焉佛氏有無生之說乃出世之
第一義也以吾師之高明反求此道必不遠而
得矣廷相頗爲不然蕙後又爲約言五經襍說
二書始號西原居士后扁其齋曰大寧齋更號

大寧齋居士而世猶稱西原先生云唐順之取其意爲銘其墓曰在昔老聃握玄化樞人皆競巧已獨若愚吾師嘆焉其猶龍乎芴芴末學枝葉不辦豈爲莞然而撥其根維聃之生寔是譙毫寂寥至今西原有作閉戶獨窺微言五千叅諸孔庭獲我同然孔曰未發聃曰靜虛立教有二其寃豈殊譬如入海所貴得珠其所從入孰一其途自是反躬精思力踐默然一悟與天游衍毫之南墟有鬱有墳嗚呼西原其尚何存

蔣子雲

蔣山卿字子雲儀真人以進士授工部主事正
德己卯武廟南狩與同官林大輅何遵伏闕
上疏諫曰昔太康遊畋不返夏德以微昭王南
征不復周道遂衰逸遊之戒聖王所謹今皇
上北臨宣代西幸榆林廢宗廟之禮曠定省之
儀且今宗藩無道方肆窺覷萬一禍生不測乃
宗社何疏內指斤激忤時貴由是天威震怒幾
斃杖下謫南京前府都事嘉靖改元詔復原

言才人外之 卷二
官改刑部歷員外郎郎中出爲河南知府改潯
州再改南寧時思田土官岑猛倡亂有詔命
撫臣帥師討之山卿督餉調度有方師得宿飽
尚羨餘鉅萬言於上官以十五代民租計餘以
賑饑後猛伏誅其黨悉降籌畫與有力焉郡以
軍興之故瘡痍殊甚隨事經理誠心拊循民又
以安舉晁進廣西叅政總督都御史林富雅知
其才方倚爲邊鎮之重而山卿以讒言罷矣在
南寧入覲奉 詔上地方利病事曰夫思龍之

民便於立縣者以租繇近可輸納之故其意惟知仍屬南寧不謂屬田州也夫割肉補瘡瘡不可補而肉徒腐所割之處必缺且陷不幸有因而死者矣若割思龍使爲廂民以供流官將田州自爲土民以供岑氏是導之使携而爲貳情不相屬而血脉不相通也且思龍何罪哉供億之煩夫役之擾視昔反多也異時田州萬一有如盧蘇者起則其禍必首思龍割肉補瘡之害立見矣若荒田之民則尤有可痛者往歲田州

之亂止戈實當其鋒攻劫焚掠慘不忍言昨王受既降前罪已赦百姓贖妻子者必與之直直不入不得贖也止戈之人恨不得食其肉今乃移思思而建府治於荒田割止戈之民爲之祇候而築城之役又不勝疲勞且思思頭目百姓仍薦故地本府流官別處荒田相去百里是棄思思而不顧也前此坐治城中民猶敢叛今棄而遠之彼將何所忌憚哉有司撫恤之恩加於思田者蓋謂寧勞吾民寧費吾財分毫無優於

彼則彼將感激而自安然恐自此遂成姑息之政而非久安長治之圖也卒不幸他日再變朝廷將何以處之乎又言兩廣總兵率用侯伯此皆執袴膏梁子弟坐享厚祿營求出鎮惟能剝削軍士需索有司詐嚇土官牢籠商賈於閭閻之疾苦軍兵之強弱山川之險要夷狄之情狀皆所未知塊然土木而委之三軍之命非計也乞選自行伍間素有謀勇不事干托者往充其任須責以鎮靜不擾撫輯民夷有事則身親矢

石奮勵先鋒庶邊將得人地方寧謐矣又言廣西夷多民少右江如柳州慶遠各州縣左江如桂林平樂各州縣皆城池圯塞墟里荒涼甚至二三百里行無人烟徃賊得以出沒其間侵奪田地是以戶口益減商旅不通而居官者亦無固志乞行撫按守巡閱視州邑脩築其城池招集其墟里繕道途置傳舍如錢糧無措辦則於梧州動支抽分鹽課給發爲工役之費夫如此則官司有所止百姓有所聚行旅有所歸彼

夷獠見吾之整肅亦將望之而遠遁矣暫贊而
永寧一勞而久逸計之得者也其經畧大槩若
此惜其用未究歸田惟徜徉詩酒校讐文藝所
著有南泠集休園集真州文學之士山卿後有
張渠朱永年渠卒於郡倅永年爲光山令剛介
不阿博極群書名文晁著

李川父

先生名濂字川父其先爲大梁人世業小兒醫
宋季有以醫顯者曾賜金鍾因稱曰金鍾李氏
曾祖得祥祖信皆傳其業父敬少業儒長精於
醫其所存活者數百人語曰活千人者後必昌
今子孫果彬彬然而李氏之族遂豪大梁矣敬
生三子先生其季也爲兒時恚而啼以棗栗啖
之愈啼示之書則止七歲就塾師日可誦千言
九歲能爲詩其語多驚人稍長習舉子業即攻

古文詞非秦漢書不讀好稱先生則古昔嘗與郡中豪雋載酒上吹臺出夷門馳昔人走馬地感憤爲懷古篇擊筑而和聞者壯之嘗作理情賦李獻吉自左舜齊所見之輒歎曰有班馬之儔乎締爲忘年交時遂菴楊公自汴入關中一見稱爲國士而郡守陳澍者媿其未之識也召試郡閣其文一揮而就語甚藻麗督學使者秦公大竒之於是汴中人士咸出李先生下而李先生亦自謂其弗已若也年二十五其年癸酉

舉河南第一人明年舉進士高等以王府如

得侍宿衛乃與仲默君采結都亭社而海內才

穎之士相望其風采乙亥出守沔陽會丙子丁

丑兩歲大浸獨加意撫字民賴以無徙亡暇則

開閣與諸生談藝遂合文體翕然丕變其所造

士甚多若太史童士疇其最著者辛巳擢貳寧

波其治亦如沔猶留意興學癸未擢山西按察

司僉事顯督屯田凡積弊湔滌殆盡後攝學政

三晉人士駸駸嚮風一時中丞及御史觀風者

交章薦之謂其德器問學於士類有所觀法云
未幾歸臥河山之陽慕延叔堅之爲人乃闢景
延堂朝則肆力六籍手自箋註夕則詠詩南軒
百家衆氏投閒而作請文者無虛日所著有嵩
渚集祥符文獻志鄉賢傳汴京遺蹟志勾異記
醫史諸傳及李氏族譜居室記凡若干卷而河
南通志多出其手先生才高學博其治行赫異
使究其用將相之業豈多讓古人哉乃獨持風
裁不能與時俗低昂而忌先生者日衆故年三

十餘而業已懸車杜門養重其詩歌遍唐文則
自成一家傳之百世無疑也世有富貴而名摩
滅者視先生何如哉

倫彥式

王舜夫

公名以訓字彥式廣東南海人也文敘仲子少
有異質書過目不忘課對輒出奇語稍長博通
經史年十六舉鄉試第六正德丁丑會試第一
廷試第二授編修予告歸娶遂侍養七年始
出乙丑修實錄成進修撰同考會試者二充

經筵講官儀度雍雅詞義懇到左右傾聽

皇上時屬目焉以考績進諭德甲午主應天鄉
試所舉皆名士丙申陞南祭酒立教嚴整士類

歸心時太恭人就養思歸遂上疏乞養庚子邁
疾卒得年四十八嚮用方殷不竟其志訃聞上
深悼之說者謂公有文莊之博而不雜有文康
之厚而不同有文敏之勇而不峻有陽明之奧
而不虛蓋實錄也所著有國朝彙憲二十卷
及詩文集若干卷藏于家

王公名謳字舜夫泉人幼穎異長而風神俊逸
倜儻不羈正德丁丑進士官工部督泉濟上改
刑部副郎權山西臬僉以疾歸卒

年纔三十有六有彭衛集

王稚欽

附顏木

公名廷陳字稚欽湖廣黃岡人自其祖父爲宦族廷陳生有異質不甚讀誦而搦筆爲詞賦作古人語汨汨千餘言不輟唐宋以下人不居也然性跣跣豪蕩少檢制四顧當世莫可意者少舉進士改翰林庶吉士出爲裕州知州以不迎送上官獲罪罷歸顧璘巡撫湖廣欽修顯陵志聘廷陳與隨州顏木俾同纂著木字惟喬亦楚名士先知河南許州已調知亳州亳州有某

素多貲而橫前守率惴惴辟之當道以木猛鷲
故調與相當計以陷木可兩踣之而木至州罷
畧諸務專意治某某赴訢于朝木坐罷某亦竟
用木破滅人至今談其事猶懍懍云璘旣聘二
人修志志成奏之有給事中劾志不如法志亦
罷廷陳旣負才被絀而詞采煥發日益侵古當
代作者自何李王邊諸人不知讓也又詩意雅
厚太不類其爲人不知其人驟誦之不知爲廷
陳也嘗與人自叙書曰僕林居無營自惟丈夫

樹立已矣莫莫詞賦小技亦無足煩其思惟舒
其悰寄也每引曲自適上不慕古下不屑俗爲
疎爲懶不敢爲狂爲拙爲愚不敢爲惡高竹林
之賢而醜其放懷三閭之忠而過其沉智鴟夷
之逝而汚其富每景物會意輒命酒自歌酒不
盡量歌不盡調倦則偃臥臥不爲夢厭苦俗塗
寧獨無與究心老莊保愛性命江湖乘興漲則
不舟雅好雲嶠苔滑磴危鮮不緩却此僕大畧
也子亦欲聞之邪其巧飾矯附著此顏木有俊

言木ノ外ニ
才在林下數與廷陳往還故廷陳集中多相酬
答而木詩竟流落莫爲升布廷陳有夢澤集若
干卷

舒國裳

先生名芬字國裳號梓溪初生時人聞空中呼
狀元姓舒幼資稟警異十二歲作馴鴈依人賦
郡守祝公奇之薦補諸生督學蔡虛齋試輒首
選正德丁卯中鄉試丁丑進士第一授翰林修
撰戊寅武廟北狩上隆聖孝疏再上車服疏
反復數千言諷諭切至己卯南巡率同院官伏
翼懇疏罪刺閣中杖幾死出福建市舶提舉
辛巳世宗立召復官連遭內外艱尋以疾卒

年四十四先生平生負氣剛毅所遇貴者嘗失
勇者嘗喪雖覺峭厲於世不可得而無爲文章
宥迭不窮所著有易問太極通書釋義周禮定
本等書南昌萬虞愷曰先生與羅一峯先後以
敢諫謫官且同於閩地閩士民慕其道德風節
又同俎豆之先生制策如董賢良封事如胡邦
衡詩文不獨兼步韓歐而直遡濂洛如論道學
則尊濂溪爲中興之聖而不滿伊川之外師叙
周禮則深斥漢儒附會之非而直責朱子之惑

且於律曆象數古今名物無不洞究精微顧天
奪之早而憂阨以終豈非數耶

崔來鳳

公名桐字來鳳維揚人也學以爲道而紛華組
繪之習弗隨以靡焉正德中嘗發解南畿進士
及第歷官翰林藩臬太常卿國子祭酒進兩都
少宗伯尋歸於東海之濱日杜門以自適纂言
以自娛陶陶然若於世一無所預者其子姓族
黨亦莫不循循煦煦無怙勢常態嘗綴其所爲
文著詩得二十卷大之而樞要具折之而品彙
彰鬯達乎性情淵源乎道義窺典謨而馳風雅

言有入物三
三三三
因物賦形無所沿襲是庸可以無傳耶

馬文簡

西玄先生者綏德州人也姓馬氏諱汝驥字仲
房正德丁丑舉進士已選庶吉士尋授編修號
爲才子能詩然先生爲人沉毅有大節己卯中

武皇帝且南狩諫者輒獲罪後縮莫敢諫者
先生曰卽畏罪寧不爲 宗廟朝廷所乎乃奮

氣抗疏率諸同館士六七輩赴 闕上之疏出

先生手切直言巡游有隱憂伏禍不可 天子

怒罰跪 闕下五日已又杖之諸上書者悉調

外而先生調澤州知州澤故多王府王率聽
用邪小暴侵民利澤人苦之而未能有禁也乃
因事稍懲其左右不法數人爲條告誡暴止又
王以書來請私好答使者去已即投書櫝中
封之所請或干法得釋又使將謝乃首使者至
櫝前啟取書還之實未發爲報曰法誠如是吾
安敢低昂徇情乎後書不更來陵川令葛者賄
人也害人人怨之廉得狀議且黜令有巡按御
史者以親故爲葛解甚力不聽竟置于法威聲

震于部中辛巳 今天子卽位錄前諫者忠

詔知州還爲編修如故澤人攀泣而送之以百
千數而前 王以禁不得暴及投書不發者亦
郊祖頌德焉曰馬先生民之父母國之正人也
其年 天子用吏請旌忠加奉一級名由此益
顯癸未會試爲同考官以觀卜才氣取士士多
類已乙酉 武宗實錄成有纂修勞陞修撰明
年毋王卒歸三年煙山公亦卒先生連哭其父
毋至嘔血毀形制起陞南京國子監司業尋改

北監司業會 天子幸太學充講官坐講言辯

而正 賜文綺而司業壓于祭酒不得有所規

畫然諸生固知憚馬先生先生持重有儀度居

數歲陞南京通政司右通政又三歲爲南京國

子監祭酒於是先生慨然曰自予爲司業固嘗

念諸生善逸繩之今與諸生約度所能行耳期

勿犯犯必罰如懸格不解其所約有懲斲跑勤

考課稽德行肅威儀數事有制太學生出散諸

曹歷事出序視入不得越而捷者或因貴關

求越疾出卒不聽卽序及故抑奪之曰以懲求者蓋自是太學之教彬彬循循多可觀云庚子禮部右侍郎缺陞祭酒右侍郎當是時少傅嚴爲宗伯宮詹松江孫爲左侍而上興禮樂創制度諸大典更起不絕諸公日聚講議而先生治覽羣集習識今昔故遇可言則問答如嚮平居視之顧恂恂若不能者嚴賢之又嘗善其詩愛重踰等居久之嚴拜相見上言馬侍郎賢上由是知侍郎因以其官加翰林侍講學士

寵之而先生故病肺爲詩節愈益工自始仕至
今未嘗一日廢書不觀遂病卒 上悼之爲遣
官致祭護櫬歸 勅有司營墓加 贈尚書以
其德履 謚曰文簡所著有馬文簡集又有西
玄先生詩集

許東侯

公名宗魯字東侯號少華陝之咸寧人也正德
丁丑舉進士選翰林庶吉士己卯授雲南道御
史嘉靖壬午按宣大癸未陞僉事湖廣提學三
年陞副使兵備霸州丁亥復改湖廣提學己丑
陞太僕少卿壬辰陞大理未幾陞僉都御史巡
撫保定自保定歸十七年而當庚戌之冬復僉
都御史駐昌平己又陞副都御史巡撫遼東壬
子乃致仕歸始公爲御史也卽劾論侍郎巡撫

兩人會宸濠事起又上言 親王護衛宜隸之
守臣其刷卷蘇徽盡按諸大猾置之法所入銀
穀至百數十餘萬 世宗御極又首上封事中
有勤視朝罷傳奉絕貢獻惜爵賞重邊備寬徵
歛尤關切時弊者已又言常湯鄧劉之後義當
復其封爵乃後四氏遂得復蓋自公言張本也
大同將卒素驕悍難制公罪其尤甚者一二人
于是將卒帖然先是太監劉祥沒邊餉以萬計
然罪止罷鎮公復請下祥于獄祥大懼卽

抵僕而御史曹嘉論諸大臣也有給事中希

甫意論謫御史公力奏御史無罪至其劾武定

侯郭勛太監蕭敬兩疏關利害尤大後以地震

上疏又言羣小竊政柄宮壺議外事國是已定

而復易罪人方獲而遽釋蓋猶指勛敬輩也一

時以爲危言宣大故有大邊正德初以地遠棄

去不守然邊勢日蹙矣公行邊顧歎曰大邊急

宜復者乃遂條畫狀聞顧當事者難之公補築

近邊卽已工完上亦賜公銀幣公又疏謝且

辭因請 上無忽重地後宣大日益難守人始
思公先見云湖廣以屬地曠遠有學者常數歲
不一至公歲試輒遍所至卽以行義倡士風楚
自是益多名士旣去霸州士日益思公乃爲具
百撫按于是撫按交章借公而公復改督學楚
中其繫時望若此是時又以救 楚府二闈與
御史力諍不屈二闈得不死人尤服其鯁直而
太僕時禁中貴人不得與事中貴人銜之乃取
服輦馬故以馬不中選困公公曰此馬誠不中

選當爲奏取入監馬充之中貴人沮遂不易馬
亦不敢復言事矣往保定以近畿民苦甚公嚴
覈驛傳又定府州縣徭賦等式已又以築堤扞
滹沱河有功 上特賜璽書銀幣旌焉是時公
已受知遇矣而南給事有與公隙者論公罷歸
縉紳咸爲公絀之庚戌會虜警給事中張秉壺
御史張洽又會科道合疏薦公 上召公復都
御史駐昌平昌平故無邊備公議修邊牆三百
里墩堡數百又疏請鞏華設一大將統入衛邊

兵昌平改叅將守 陵寢以鞏華分守駐懷柔
爲東遊擊白羊口爲西遊擊又言昌平得一兵
備治京北霸州者以至京南卽昌平撫臣可罷
不設議未盡施用無何乃移公遼東至卽議處
鹽課課大增諸軍占種民地者勒令悉歸之民
遼東故與三衛諸夷互市部議北虜亦開市遼
東公移書駁論不可者十事遂寢遼人甚賴之
力求致仕歸別構草堂積圖書其中日召故所
與遊者置酒賦詩亦時時作金元人詞曲爲樂

所著少華集續集與陵下遼海歸田諸集數十
卷其詩足繼唐音文復精典有漢魏風而作字
又精詣古法諸行草大小楷書雜置法帖中人
莫能辨公卽老猶能作小楷字當其得意時一
揮輒數十紙不倦得公詩翰者咸珍玩藏之謂
當代二絕云

凌時東

凌公名震字時東號練溪烏程人由歲貢授黔陽縣學訓導中丞鐵橋黃公督學少華許公重公之學到官月餘即命提督寶山書院選拔名彥俾受學焉公入院嚴立科條陳說倫理之懿啟迪性命之微一晷士習改觀未幾遂請老以歸歸卽掃跡城廡杜門自養圖書數卷亶亶不倦輿到則獨步林壑尋芳討勝風度悠然清修之範近世罕聞與劉清惠孫大初爲一時名交

言木ノ外ニ
郡守萬雲鵬高其行敦請鄉飲卒于嘉靖乙未
春壽六十五公生而穎異有俊才博綜羣籍曉
析百家善古文尤長於詩所著有練溪集行於
世

胡承之

胡侍字承之陝西咸寧人關中人多古學而侍詩文簡潔精慤自成家東頗效左傳六朝之體中書舍人張才爲序曰蒙谿先生弱冠舉進士與信陽何中舍譙郡薛考功齊名以鴻臚卿亞諫議免歸著有詩文板行屬余爲序夫自六義輟講而詩教寢衰五傳異觀而文體漸裂師工失其真授學士惑於定往而今昔殆不相及矣務艱者氣鬱而不信樂易者神渙而弗耀侈博

者意累而靡潔執間者情凋而罔悉隨才曲就
代豈無人揔究詣極殊未多覲也若乃架度遵
循於逸軌意旨經理於淵宗辭采延攬于名彥
音節約擬于元聲而斯集者可謂得之矣學不
泥往力振古風文不附時盡削凡品孤轅與楚
漢同驅奇標共陳韓並峙冠冕藝囿衣被詞人
卓哉一代之言也彼近世思不通圓而極貌摹
倣識未周洽而委心剽效支戾弗經踏駁可厭

篇帙雖富豈可以稱哉朝章埜紀

他集數種已
並傳于世

陳宗魯

名沂字宗魯後改魯南先世本鄞人 國初
始家南都父綱長沙府通判沂總角著孔墨辯
赤寶山賦諸文舉進士改翰林院庶吉士除編
修與編修鄒守益等及修撰楊慎再論大禮進
侍講隨克 經筵講官 上問宰臣知其名出
爲江西布政司叅議進山東左叅政嘗遇執政
於德州勞之曰先生久外將召矣對曰齊民困
甚苟行吾疏勝吾受德意大忤遂改山西行太

僕卿再上疏請老歸築遂初齋杜門著書絕意
世事所著有拘虛集若干卷又雜著金陵圖考
金陵世紀等書初沂父綱善爲政有惠化在民
南都顧璘論其土之人物有曰宗伯童軒擇地
而蹈擇言而言吐辭濡翰必軌其方慎哉愿乎
叅議王微事君以忠行已以義亢而不徇困而
彌貞矯矯乎疆毅君子矣太僕李應禎氣直行
廉義有不合一介不以取與文翰之精譬諸銛
戟利劍掉以淮陰之行雄其鋒莫當矣其介且

有文者乎通判陳綱愷悌宜民死無餘藏而故
民懷思冉冉有桐鄉之風蓋古之遺愛也爲名
流所推如此

夏公謹

嚴惟中

夏言字公謹貴溪人舉正德丁丑進士爲行人
授吏科給事中累遷都給事中以上疏論 郊
祀遷翰林侍讀學士再遷少詹事遂拜禮部尚
書入 內閣久之累加少師太子太師吏部尚
書 華蓋殿大學士坐法下獄誅死王鳳洲筆
記云少師襲偉邁躡要階襖起幾望終作僂人
才長於奏牘與詞爾

嚴嵩字惟中分宜人舉進士爲翰林編脩遷侍

讀累官少師太子太師吏部尚書 華蓋殿大
學士有鈴山堂集行於世王鳳洲筆記云高詩
少年如碧苕依依水清石見春雲綴空濃淡有
情惜氣格小緩結語意盡耳後不復點檢隨人
得之豈廊廟泉石體裁自別耶抑所謂不復唱
渭城者耶

吳維新

許伯台

吳君諱鼎字維新錢塘城北隅人也中正德進士釋褐試吏尹臨淮臨淮帝鄉壯縣民多優復習游惰公私玩敝謾偷政廢不舉糾紛倍十左小邑宿吏側目少君君穎識敏裁便宜張弛更以辦治稱監司使者僉上君治行異等堪風紀選不報 毅皇帝南征侍衛中外諸臣騎乘數十百萬所過縣次續食有柄事中貴人道臨淮非分徵索供具無厭橫甚君從民吏往致常饋

不羸中貴人大失望憤詬呼挺君銳身先民吏
當之民吏爭前衛君擊傷中貴人中貴人奏逮
君繫 詔獄一歲所者廷議白君還治用舉者
徵爲南京刑部主事轉南京兵部主事以承德
公喪罷歸除喪謁告不仕者十有五年用舉者
補南京兵部員外郎轉南京禮部郎中遷廣西
布政司左叅議乞侍養亡何病卒年五十三知
君者莫不傷懷垂涕云君生好文特甚其爲臨
淮罷劇猶手一編吾伊空堂中治當南北達途

過客時有中原文獻家博文邃古諸名士大夫
君輒委已交驩與相下上其論旣謝病屏居愈
益專力萃精償其積志六籍而下九流諸子策
士春秋先秦盛漢之譔古今石竹簡之傳旁逮
外家雜說譎誕恠迂之語凡奇古文字罔不雋
飫醇醑江左北朝以還唐宋近代諸名家亦皆
決藩入奧神詣作者故其文深涵大放贍蔚閎
肆能盡達其意所欲言淵乎蒼然有西京風骨
所著名泉亭存稿

公名相卿字伯臺號雲邨杭之海寧靈泉里人
晚徙紫雲自稱雲邨老人云老人曾官給事建
白甚多自免歸以中外諸司薦再起辭疾復乞
致仕結屋紫雲山中水石幽勝處食力咏志讀
書彈琴無一跡抵親交城市四十許年所撰著
雅有漢人風集若干卷行于世

朱子文

敖子發

公名豹字子文上海人以正德丁丑進士知奉化縣調繁餘姚尋擢貴州道監察御史有直聲數上書言便宜事皆經國大猷未幾出爲福州守以卒福人之德公不減治邑時也公平生詩文甚多攷公之先以詩名者四世其所由來者遠矣

東谷敖公諱英字子發清江人正德辛巳進士由南刑部歷陝西河南學憲官止右轄所著心

言林人集卷之二
遠堂詩與幽思遠盡絕蹊徑超悟上乘足稱名
家又著綠雪亭雜言東谷贅言皆關修身立政
之大者非尋常稗官家可例觀也

童士疇

先生諱承叙字士疇沔陽人也始祖自隨徙沔而沔南有內方山因號內方山人云先生有異質八歲時過目成誦爲文數千言立就大梁李公濂與獻吉仲默交驩號中州才子守沔見先生竒之益下帷讀楚詞文選及六朝文咀其英粹故含芳摘藻若夏雲秋水不可方物時正德己卯甬川張公邦竒督學又竒先生文嘆曰眞楚才乎薦于監察毛公伯溫以詩經舉鄉試第

二兩公尚恨先生不第一也明年庚辰中會試
值 肅皇帝繼統選翰林院庶吉士與茶陵張
公治蒲圻廖公道南號楚三才而先生尤俊逸
不群試輒冠同館而同館敬服人人自以爲不
如也壬辰公補國子監司業 上方更化而祭
酒又關中呂公聃倡明正學先生佐之留意教
化呂公教主嚴如泰山喬岳壁立萬仞而先生
兼用寬如和風慶雲令人景慕環橋門而觀聽
者以萬計前此未有也先時先生修 列聖寶

訓實錄及會典諸書進先生左春坊左庶子兼翰林院侍講仍攝國學歲庚子先生主順天鄉試得劉一麟等一百三十人其程文典麗學者式焉壬寅上疏省封樹得馳驛以行蓋異典焉先生歸與親知倘伴江湖放歌命酌里門來親就先生者日衆先生油油然與之偕而無間人言無何病且卒 主上聞而憐之遣官諭祭嗟乎先生周旋詞林二十餘年往聞 肅皇帝御 經筵先生講立政諸篇惓惓于用正人端

國本又聲如洪鍾徹殿庭 上喜動顏色賜飛
魚服而中貴人徃徃走問童先生不休蓋大拜
之兆也時故相貴溪夏公言忌先生才又學士
多遺貴溪公金得美遷先生笑曰何可爲此耶
遂甘心不調其節槩如此先生早慧英敏天骨
秀朗緩頰而談傾其坐人每一屬文筆端風起
如掀雷抉電又如江河東注其詩文多不存稿
大都出入漢魏六朝自成一家言其字畫道逸
秀媚置趙文敏真蹟中莫辨也先生少悅紛

之習及至中年刊落殆盡嘗寓書大梁李公曰
往者觀書如端冕聽古樂惟恐臥耳近稍知紬
繹容有感通之地爲文牽於事實近稍擺脫容
有獨出之意豈犬馬齒長故蓬心漸開邪抑數
年憂鬱將有所激昂邪所著沔陽志得遷固法
海內名志如康德涵撰武功王敬夫撰鄆縣及
先生而三也

黃文裕

先生名佐字才伯泰泉其號也廣東之香山人
正德庚辰進士歷官翰林宮詹侍讀學士卒贈
禮部右侍郎謚文裕所著書二十二種先生學
範程朱迥流孔孟平生服膺博約之訓慎獨而
力于行其操觚命撰爾雅名家理學之士率墮
理窟萎蕪腐迂公獨不然理學而兼辭藻者
本朝如公不幾見也其五七言近體雄深麗逸
旨遠格精足以入室王揚升堂李杜至于賦樂

言才ノ物ニ
分ラ
三三
府古詩兼總古今旁通音調端方入矩圓融出
規殆憑軾而馳漢魏結轡以取風騷也弇州山
人乃謂黃才伯如紫瑛石大似靺鞨晚年不無
可恨夫豈篤論哉

張文肅

李時言

公諱治字文邦湖廣茶陵州人也性稟英毅學
覽淵博自少以經濟爲心正德辛巳舉會試登
二甲進士改庶吉士授編修嘉靖丁亥同修

大典書成授贊善歷諭德學士遷南吏侍改吏
左侍掌翰林院陞南禮書巳酉改禮書兼 文

淵閣大學士加太子少保卒贈太子太保謚文
隱萬曆初改謚文肅公弘襟曠度瞻智長才議
論侃直無所瞻顧聽者毛竦不敢犯兩典鄉會

文衡號稱得人尤喜獎進忠直汲引善類其於
權貴視之漠然不肯阿附以固祿位用是佐政
未久賫志而歿海內傷之所著有龍湖文集
李公名默字時言福建建寧人也正德辛巳進
士歷官吏部尚書爲趙文華構陷斃于獄天下
冤之後竟曰公所著有群玉樓稿大有秦漢人
風秣苑至今推重之

周天保

公名祚字天保號定齋山陰人也孫仲可叙其
集曰正德辛巳天保舉進士與蒲圻廖鳴吾沔
陽童士疇嶺南黃材伯關中何伯真四明陸舉
之今尚書甌寧李公時言皆以詞學名未幾鳴
吾輩選爲庶吉士而天保出補來安令改給事
中已棄其官去慕空同李子之學馳書訊質李
重其文答許之而天保以是名益顯集凡若干
卷云夫詩以詞勝亦以音先然南北氣殊音則

象焉中原之音渾雄沈着含蘊弗露吳越地偏
厥音輕俊纖靡幾乎濫矣斯西施若耶之遺而
勻踐事夫差之所習也然學士大夫崖崖從之
者非以其流曼易入而委媚足以悅人故遂淫
漸如此哉東橋顧氏曰空同詩近粗夫粗必涉
俗匪俗不粗空同詩俗邪是所謂中原之響而
渾雄沈着之正韻也此而粗名之則顧之作雖
列諸吳越間詩奚不可邪且粗與細疑似當辨
粗以俗配粗卽以渾沉細以密言細亦非輕媚

也譬諸黃鍾大釜洞扣洪播而迤邐中具彼彈
絲鳴竹者一聽盡焉俗人不知顧以爲妙音於
是乎病矣今觀天保集賦則而靡樂府婉而厚
五言淳而鉅柏梁驟而典近體諸篇脫纖畧冶
持重宗樸序記書贊則髣髴漢儒而駕唐絕宋
遠甚謂非空同家出邪夫流風遺俗未論衆常
雖豪傑士淪之故詩以拔去陳故爲尚天保者
非吳越間人哉乃其詩顧若是斯亦謂特立不
移者矣

鄒襄惠

公名守愚字君哲閩之莆田人也正德進士弱冠卽以才名覽綜百家不倦且持身以禮不爲媒孽態其知廣州府時政平訟簡樂於育才人士斌斌嚮風焉擢副使時方有事安南公多方招撫之筭無遺策累遷都察院副都御史晉戶部侍郎贈工部尚書謚襄惠所著有文集若干卷行于世不襲前人口吻而醇正典雅自能成家者

杜研岡

杜柟河南臨潁人自號研岡第進士歷官至都
察院副都御史喜爲詩有遺稿頗脗高叔嗣爲
序之曰河南中國之樞四方之都會人文最盛
明興沾濡王化瓌傑挺生自叔嗣得承宴侍
茗空同李先生大復何先生浚川王先生後渠
崔先生柳泉馬先生有涯孟先生研岡杜先生
七公猶宗廟之有瑚璉朝廷之有梁棟士用仰
止觀其精美之蘊卓犖之節敷爲政事發爲議

論衍爲辭章著爲翰墨皆中榘度以垂法式巨
細咸宜物理必該成一家言而余得交於研岡
實有忘年之誼相與考先王之道遵哲人之軌
彌歷年所叔嗣始爲隸古之學本以說文證以
萬彙考以漢碑准以章草先生不爲之異爲辭
賦之學先國風楚騷次漢樂府昭明所選下涉
盛唐先生不謂之溺爲制度之學考周五官酌
漢八書及唐六典遵諸司職掌先生不謂之迂
泊然自守不養交游不貴權勢以違于時先生

不謂之愚道合則從不合而去仕于吏部屢
補吏邊隅先生不謂之罪可謂相得于形骸之
外已先生有集若干卷衆刻之傳於世叔嗣蒙
知最深宜序左方

王繩武

國子司業王先生同祖字繩武崑山人也先生
豐下長目美鬚和易坦洞不設城府二十四薦
南宮明年始 廷試改翰林院授編修爲詩清
麗有唐人風善草隸一時才名大噪而新貴人
有同年者故爲先生所輕內銜之假大察逐先
生歸蓋十餘年置東宮官僚以編修兼司經局
正字起故同輩皆顯重而先生猶僕僕一羸馬
青衫僅遷國子司業時先生書刺字奇大人頗

怪之北虜歲大入邊殺掠吏民先生上書請捐
內帑數百萬金以間遘北荒外之虜與中國夾
攻而不得其主名凡再上御史以非所宜言糾
正之先生益憤憤不自得請 上還宮改元創
新政以整齊宇內改元 上所諱也見之恚甚
幾欲置大辟尋解斤爲民先生大悔恨暴得風
疾久之卒先生雖官挫名損然負材不獲究至
今爲流輩所惜

張補之

薛應登

公江陰人名袞字補之中正德丙子鄉試庚辰
會試至嘉靖辛未擢第由翰林庶吉士改臺諫
復爲編修歷陞侍讀學士國子祭酒止于光祿
寺卿公居江湖馳心廊廟常忽忽不樂也年七
十餘卒所著有水南集

薛兵憲亦江陰人名甲字應登號畏齋由嘉靖
己丑進士歷官贛州兵備解歸自憤世不已知
杜門養靜專事吟咏尤好禪學諸所著述頗多

先是有薛浮休集卽其先君子也

張允清

公名寰字允清別號石川吳郡崑山人正德辛巳進士仕至通政司叅議國制四品以上官自陳公爲通叅遇天變當路勒令自陳斤之公謂非制也常懷不平奮然有光復之志久而不遂乃以其紆朱曳紫之情發而爲登山臨水之興又以其登山臨水之興衍而爲吟風味月之情蓋遊興詩懷終其身不少變云藉令位益通顯公遊興詩懷未必若是專且久也有集著于

卷

包子木

公名梧字子木郵人也名御史包澤之子生而
穎異讀書過目輒不忘領嘉靖壬午鄉薦通判
蘇州時織造中貴怙勢傲視故事判庭叅梧獨
長揖不屈諸額外取索裁革殆盡心嚙之誣奏
逮 詔獄謫無爲州同知未幾移成都府通判
尋陞漳州同知漳瀕海盜藪長吏視爲汎常弗
問梧特設竒鈎致捕繫株連不遺餘力人情殊
不帖帖竟奪歸梧爲文率竒詭雄俊自成一家

讀林人物考

卷六

六十三

言有白厓集